

P R O L O G U S.

*affectibus & præconceptis opinionibus vacuum. Nec abludit Remonstrantium Confessio, quando ait cap. 1. sect. 14. Non doctos tantum Lectores, sed & idiotas mentem eorum, quæ ad æternam salutem necessaria sunt, assequi posse, modò præjudiciò, vanâ confidentiâ, aliisque pravis affectibus sese occæcari non sinant. Gravissimè autem omnium Zwinglius in libellò de Certitudine & Claritate Verbi Dei (qui reperitur in ejus Operum Tom. 1.) cap. 3. hunc in modum. Fateberis te sæpenumerò Scripturas in hunc finem perlegisse, ut verba quædam, quæ sententiæ jam antea conceptæ suffragarentur, exciperes, quibus opinionem tuam, quam mordicè retinere cupis, confirmares. Hoc, hoc omnium humanarum Traditionum ulcus est, quod acu tetigisse dolet. Quid enim hoc aliud est, quàm sensum proprium Scripturæ testimoniò probare velle, alienum sensum Scripturis ingerere, & errori suo Scripturarum prætextum & patrocinium querere; ut nimirum Scripturæ locos, repugnantes licet, & invitos, in tuam sententiam pertrahas, & eos id, quod jam ante tibi persuasum est, loqui cogas? præjudicia enim nostra jam lata sunt, quæ in manu gestamus, perinde ac si quis à viciniò suò armatâ manu panem petat, quem nisi det, vim sibi inferri sentiet. Quibus exemplum addit, ac postea concludit. Unde nunc colligi potest, quàm parum conveniat violentò animi nostri præjudicio Scripturas accedere. Atque huc etiam videtur pertinere illud tantopere Theologis decantatum Hilarii monitum, Sensum Scripturis non esse inferendum; sed è Scripturis petendum. Tantorum itaque virorum auctoritate, atque ipsius rei veritate per-motus ac suffultus, manum operi admove-re volui, ac Cartesii vestigiis insistentes experiri, num Theologum agendò, atque in Theologiâ, quicquid tanquam dubium ac incertum, removeri potest, removendò, tandem perveniri posset ad aliquid in eâ primum, quod removeri nequeat, quin tota simul corruat atque removeatur, quodque reliquorum omnium dogmatum Theologicorum principium esset atque fundamentum. Huic autem negotio dum incumbo, non diu multumque scrutatus*

tatus